

ne doute point que vous ne puissiez me guerir. C'estoit là toute sa priere, qu'il repetoit sans se lasser, avec une ferueur & un respect, qui en donnoit à tous ceux qui le consideroient.

Quoy qu'il en soit, l'effet de sa priere nous fit paroistre qu'elle auoit esté exaucée: il se trouua parfaitement guery, & ce qu'il estima luy mesme, plus que sa guerison, il fut alors si éclairé & si remply de Dieu, que iamais il n'auoit veu la foy si belle, iamais n'auoit veu si clairement la vanité de cette vie; iamais n'auoit tant estimé le bon-heur qu'il possedoit d'estre Chrestien: Aussi estoit-ce de ces graces interieures dont il se coniuist avec nous, & dont il remercioit Dieu, plus que de sa fanté.

Il retourna en son Bourg dès le lendemain, sans baston & sans ayde, d'un pied & d'une démarche aussi ferme, que si iamais il n'eust eu aucun mal, & du depuis sa constance, son zele, sa deuotion, & l'amour [95] qu'il a pour ceux qui l'enseignent, & qui luy ont appris, dit-il, à cognoistre son Dieu; en un mot sa vie exemplaire, & vrayement digne d'un Chrestien, en un âge dans lequel la nature n'a de pente qu'à la débauche: tout cela nous fait esperer qu'il n'en demeurera pas là, & qu'il pourra un iour estre Apotre de son pais, & porter un feu plus diuin dans la nation du feu.

Quelques-uns se rangent à la foy quasi d'eux-mesmes; les autres ne se rendent qu'après de longues resistances: les uns en recherchent long temps l'entrée, & avec bien des peines, les autres se verront dans le Ciel par un rencontre inopiné, & comme par hazard. La prouidence de Dieu est égale pour tous,